

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō ní cáni

¹ Jnūhun cátee ri cuajeē nuū rō jijnáhan ró cúu jnūhun máá Yaā jeē je íyó ndé ná tu jecōo tāca jēē iyó. Te ni cajini sōho ri jeē ni cáhān yā, te ni cajito jínúu rī yā, chi ni cajito vāha ri nuū yā, te ni cajniī ri yā. Te máá yá cúu Jnūhun cotecu yō ní cáni.

² Chi Yaā yáha jēē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jnūhun cotecu yō ní cáni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri.

³ Jeē ní cajito ri jíin jēē ní cajini sōho ri, yūcuan cúu jeē cácastūhun rí nuū rō, návāha coo inuú ni rō jíin yó jijnáhan yó. Te jendaá chi cáhīyo inuú ni yō jíin máá Tátá yō Yaā Dios jíin Séhe ya Jesucristo. ⁴ Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yáha cúu jnūhun ni steén Jesucristo nuū rī, te vijna cácastūhun rí nuū rō: Yaā Dios cúu luz, chi yōhyo ndaā yā, te tú cuiti na jniñu néé íyó jíin yá.

⁶ Núu cácahān yō jeē cáhīyo inuú ni yō jíin yá, te núu cájica yó nájñūhun nuū néē jeē sáha yó jniñu néé, núu súcuan te cástáhú yó, te nasūú jniñu ndaā casáha yó. ⁷ Te núu cájica yó jíin luz yā jeē casáha

yó jniñu ndaā, nájnūhun íyó máá yá jíin luz yā jeē sáha ya jniñu ndaā, yūcuán na te cáhiyo inuú ni yō jíin táca jnáhan yó. Te niñi maá Séhe ya Jesucristo sándoo yóhó núū ndihi cuēchi yó.

⁸ Núu cácahān yō jeē tú na cuēchi yó, te cástáhú yó maá yó jeē jéni ni yō súcuan, te tu ñúhun jnūhun ndaā ini yō. ⁹ Te núu nacani ndaā yō cuēchi yó núū yā, te cone cáhnu ni yā nuū cuéchi yó, te sándoo ya yohó ndihi jeē neé cásáha yó. Chi jíni yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te nájnūhun sáha yó jéē Yaā stahú cúu ya, te tu cándíje ndije yó jnúhun ya.

Cristo cúu Yaā cahán jehē yō

2

¹ Tāca jnúhun yáha téé ri cuajeē nuū rohó jéē cácuu ró nájnūhun sēhe ri, návāha ma sáha ró cuéchi jíjnéhan ró. Te núu ndé ñn ró ní sáha cuēchi, te íyó máá Yaā cahán jehē yō nuū maá Tátá yō Yaā Dios. Jesucristo Yaā ndaā cúu ya. ² Te ni socō yā maá yá jeē ndahva yā cuēchi yó, te nasūu cuéchi máá-ni yó, chi suni cuēchi ñayuu ní ñáyiví.

³ Núu squícu yó jniñu ndácu Yaā Dios nuū yō, jíin yúcuan cúcáhnu ni yō jeē jíni ndije yó ndese Yaā cúu ya. ⁴ Te núu cáhán ñn ñayuu: Ruhū chi jíni rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúú yó jíin yá chí tuú. ⁶ Núu cáhán ñn ñayuu jeē nduú i jíin yá, cánuú jéē caca ndaā i nájnūhun ni jica Jesucristo.

Jniñu jéé ndácu ya nuū yō

⁷ Hermano, nasūú ñn jniñu jée ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejée ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quívi ní quejée ró candíje ró. ⁸ Te vēsú súcuan, te níní jniñu jée cúu, te jniñu ndaā cúu nuū Cristo jíin núu maá ró jijnáhan ró. Chi je cuayáha jniñu néé jée iyó núu néē, te je stéen maá luz ndaā ini anuá yō vijna.

⁹ Núu ñn ñayuu cahán i jeē jíca i jíin luz yā, te núu jíto uhū i jnáhan i, ñayuu ún chi jíca ga i nájnūhun nuū néē jíin cuéchi. ¹⁰ Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu váha. Te ni ñn ma cúu sáha jeē quívi i cuéchi. ¹¹ Te ñayuu jíto uhū jnáhan, chi iyó i nuū néē, te jíca i nuū néē. Te tu jíni i ndé chi quíhín i, chi nuū néē un ní jesi jeē tu jécūhun ni i.

¹² Róhó jée cácuu sēhe, tée ri jnūhun yáha cuájeē nuū rō, chi jeē síquí Jesucristo te ni ine cáhnu ni Yaā Dios nuū cuéchi ró. ¹³ Róhó tátá jijnáhan ró, suni tée ri nuū rō, chi cájini rō ndese Yaā cúu Yaā iyó ndé xīhna ñúhún. Róhó tée suchí jíjnéhan ró, suni tée ri nuū rō, chi ni cacundeyí ró jeē tu ní cúu síquí jexeén rohó cuéchi.

Róhó jée cácuu sēhe, tée ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. ¹⁴ Róhó tátá jijnáhan ró, suni tée ri nuū rō, chi cájini rō Yaā iyó ndé xīhna ñúhún. Róhó tée suchí jíjnéhan ró, suni tée ri nuū rō, chi cáhīin nīhin ró, te cácandíje ró jnúhun Yaā Dios, te ni cacundeyí ró síquí jexeén.

¹⁵ Ma cutóó ni rō síquí ñayívi, ni tāca jée iyó ini ñayívi. Chi núu ndé ñayuu cutóó ni i síquí ñayívi,

ñayuu ún tu íyó mánī i jíin Tátá yō Yaā Dios. ¹⁶ Chi tāca jéē cúu cuenta ñayīví, nasūu ndé nuū Tatá yō Yaā Dios vēji, chi cuenta ñayīví cúu. Te yūcuan cúu tāca jéē cájni ni yō jeē cuní modo neé máá yó, jíin jéē ndíyo ni yō jeē jíto yó núū, jíin jéē sandúxí yó máá yó síquī ndajníñu névāha yó. ¹⁷ Te cuandīhi ñayīví jíin táca jéē ndíyo neé ni yō. Te ñayuu casáha jeē cuní máá Yaā Dios, chi cotecu i nń cáni.

Jnūhun ndaā jíin jnúhun stáhú

¹⁸ Róhó jéē cácuu nájñūhun sēhe ri, cáhán rī jíin ró jeē cuandīhi quivī. Te je ni cajini jñūhun ró jéē quíji máá téē cuu contra síquī Cristo. Te nde vijna je ni canecoo cuehē téē jeē cácuu contra síquī Cristo. Te jeē yūcuan jíin yō jeē cuandīhi quivī. ¹⁹ Mēhñu máá yó ni quendacoo de, te nasūu jnáhan yó cácandije cácuu de. Chi núu jeē jnáhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jéē násūu jnáhan yó cácuu ndīhi de.

²⁰ Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jñūhun ndaā. ²¹ Núu súcuan te téē ri yāha cuájeē nuū rō, síquī jeē cájini rō jñūhun ndaā, nasūu síquī jeē tu cájini rō. Te cájini rō jeē tú na jñūhun stáhú íyó nuū jnúhun ndaā.

²² ¿Ndé ñn cúu jeē cahán máni jñūhun stáhú? Suu téē jeē cahán jeē Jesús, tu cúu ndije ya Cristo, Yaā ní tají Yaā Dios. Yūcuan cúu téē jeē cúu contra síquī Cristo, chi tu jéjñúhún de máá Tátá yō Yaā Dios jíin Séhe ya. ²³ Tāca ñayuu jeē tu jéjñúhún i Séhe ya, suni tu íyó máá Tátá jíin i. Te ñayuu jeē jejñúhún i Séhe ya, suni íyó máá Tátá jíin i.

24 Núu súcuan te chuhun vāha ni rō maá jnūhun ni cajini sōho ró ndé jeē xíhna ñúhún. Te núu ñúhun vāha ni rō jnūhun ní cajini sōho ró ndé jeē xíhna ñúhún, yūcuán na te suni ndúú ró jíin máá Tátá yō jíin Séhe ya. 25 Te yāha cúu jnūhun jeē ni jéjnūhun Jesucristo nuū yō: jeē cótecu yō ñí cáni sáha ya.

26 Jnūhun yáha ní tee ri nuū rō jeē cástūhun rí siquī ñáyuu cánducú stáhú rōhó. 27 Te máá ró jijnáhan ró, chi ni jēhe Jesucristo Espiritu Santo, ndeé yá ini anuá rō. Te jeē yúcuan tu jíni ñúhún jéē steén ni ñn ñayuu nuū rō ndé vé cúu jendaá, chi máá Espiritu cúu jeē steén ndihí nuū rō, te steén yā jnūhun ndaā, chi tu stáhú cuiti yā. Núu súcuan te caca ndúú ró jíin Cristo, nájñūhun steén Espiritu nuū rō.

28 Séhē jijnáhan ró, vijna te na cáca ndúú ró jíin Cristo, návāha núu na quénda ndijin yā, te ma yūhu yó, ni ma cúcanu yō nuū yā quiví ndíji ya. 29 Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

1 Nacā jeē yóhyo ni cundáhú ni Tatá yō Yaā Dios yohó, chi ni nihīn yō jnūhun cuu yó séhe ya, te suu cúu ndije yó. Jeē yúcuan, ñáyuu ñayiví tu cájini i jeē cúu yó séhe ya, chi tu jíni i ndese Yaā cúu máá yá. 2 Ñánī mánī, vijna te cúu yó séhe Yaā Dios, te ná tu cuni yō ndese coo yó ñí cáni. Te je jíni yō jeē quiví quénda ndijin Jesucristo, te nduu yó nájñūhun íyó máá yá, chi coto yó núu yā ndese íyó yá. 3 Te tāca

ñáyuu jeē súcuan ñúhun ni i, chi sándoo i ánuá i, nájñūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā. ⁵ Te je cájini rō jeē ní quiji Jesucristo ini ñayīvi návāha quende yā cuēchi yó. Te máá yá tú na cuēchi ya. ⁶ Te tāca ñáyuu jeē nduú i jín yá, tu cájica i jín cuéchi. Te tāca ñáyuu cájica jín cuéchi, tu jín i ya, ni tu jécūhun ni i ndese Yaā cúu ya. ⁷ Séhē jijnáhan ró, coto ró jéē ma stáhú ni ñn i róhó. Chí na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun íyó ndaā máá yá. ⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snáā yā tācá jniñu néé sáha jexeén.

⁹ Ni ñn ñayuu jeē cúu sēhe Yaā Dios, tu jíca i jín cuéchi, chi ni sáha Yaā Dios jeē ní nduu i nájñūhun íyó máá yá. Te ma cúu ga caca i jín cuéchi, chi sēhe Yaā Dios cácuu i. ¹⁰ Súcuan cuni yō ndé ñn cúu sēhe Yaā Dios jín sēhe jexeén: Tāca ñáyuu jeē tu sáha jniñu ndaā, jín jéē tu cúndáhú ni jnáhan, nasūu sēhe Yaā Dios cúu i.

Jeē na cúndáhú ni yō jnáhan yó

¹¹ Yāha cúu jñūhun jeē ní cajini sōho ró ndé jeē xíhna ñúhún: jeē na cúndáhú ni yō jnáhan yó. ¹² Te ma sáha yó nájñūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Si quī jeē ñani de ni sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayīvi cáquīñi ni i nuū rō. ¹⁴ Te máá yó chi

siqui jeē cundáhú ni yō jnáhan yó, súcuan jíní yō jeē jé ni cācu yó jéē cótecu yō ní cáni. Te ñayuu jeē tu cundáhú ni jnáhan, íyó i jín jnúhun jnahnū ndetū i. ¹⁵ Chi tāca ñáyuu quití ni nuū jnáhan, nájñuhun ñayuu jéñni ndīyi cúu i. Te cájini rō jeē ñáyuu jéñni ndīyi, ma nihín tahu i cotecu i ní cáni. ¹⁶ Jeē ni jíñi Cristo jehē yō, yūcuan cúu jeē steén cají ndese cúu jñuhun cundáhú ni. Te máá yó, chi suni súcuan jíní ñúhún cundáhú ni yō jnáhan yó vēsú na cúu yō jehē i. ¹⁷ Te núu névāha yó jéē cótecu yō ñayīví, te núu jíní yō jeē cúmanī nuū jnáhan yó, te núu tú cundáhú ni yō i cuāha yó jéē jíní ñúhún i, núu súcuan ¿te á íyó mánī yō jíñi Yaā Dios, chi naún? ¹⁸ Séhē jijnáhan ró, ma cundáhú ni yō jíñi máá jnúhun cáhán-ni yó, chi sa suhva na cundáhú ndije ni yō nde jíñi jniñu sáha yó.

Ndese cucáñnu ni yō jeē váha sáha yó núu Yaā Dios

¹⁹ Te súcuan cundaā ni yō jeē squícu yó jnúhun ndaā, te cucáñnu ni yō jeē váha sáha yó núu yā. ²⁰ Chi núu ánuá yō tú vāha sáha siquí jeē iyó cuéchi yó, te Yaā Dios chi cújéñnu ga yā vēsú anuá yō, te jíní ndíhi ya tācá un. ²¹ Núu súcuan ñánī mánī, núu vāha sáha ánuá yō siquí jeē tú na cuéchi yó, yūcuán na te cucáñnu ni yō jeē váha sáha yó núu Yaā Dios. ²² Te tāca jéē cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsi ni yā. ²³ Te yāha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíñi jéē na cundáhú ni yō jnáhan yó, nájñuhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, ndúú i jíñi yá, te ndéé yá ini anuá i. Te jíñi

máa Espíritu jeē ni jéhe ya jeē ndeé ini anuá yō, jíin yúcuau te jíiní yō jeē ndeé Yaā Dios ini yō.

Jnūhun jeē véji nuū Espíritu jíin jnūhun cáhán contra Cristo

4

¹ Nánī mánī, ma candíje ró táca tée jéē cácahān de jeē jíin Espíritu Yaā Dios cánacani de jnūhun. Chi sa suhva coto ndee rō de, núu nde nuū Yaā Dios véji jnūhun cácahān de, chí tuú. Chi ini ñayīví je ni canecoo cuehē tēe cánacani jnūhun stáhú, te cácahān de jeē ndé nuū Yaā Dios véji. ² Te súcuau nacuni rō ndé-ni i cúu jeē jíin Espíritu Yaā Dios cáhán: táca ñáyuu jeē cácahān ndaā jeē ní quiiji Jesucristo, ni nduu ya tēe, máá i cúu jeē jíin Espíritu Yaā Dios cácahān. ³ Te táca ñáyuu jeē tu cájejnūhún jeē súcuau ni nduu ya tēe, máá i chi nasūu jíin Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnūhun ró jéē quíjicoo ñáyuu súcuau, te vijna je cáhīyo i ini ñayīví.

⁴ Séhē jijnáhan ró, máá ró cácuu séhe Yaā Dios, te je ni cacundeyí ró siquī tée cástáhú un. Chi jéhnu ga cúu poder maá Yaā jeē ndeé ini rō, vēsú poder maá jéē ndeé jíin ñáyuu ñayīví jéē castáhú. ⁵ Máá i cácuu cuenta ñayīví, te jeē yúcuau cácahān i jnūhun cuenta ñayīví. Te ñáyuu cácuu cuenta ñayīví, cájini nahín i jnūhun ún. ⁶ Te máá yó chi séhe Yaā Dios cácuu yó. Te ñáyuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñáyuu jeē násūu séhe Yaā Dios cácuu, máá i tu cájini nahín i jnūhun cácahān yō. Te súcuau nacuni yō ndé-ni cúu jeē cáhán jnūhun ndaā jíin ndé-ni cúu jeē cáhán jnūhun stáhú.

Máni jnūhun cundáhú ni iyó jíin Yaā Dios

⁷ Ñánī mánī, na cundáhú ni yō jnáhan yó, chi jnūhun cundáhú ni, nde nuū Yaā Dios vēji. Te tāca ñáyuu cundáhú ni jnáhan, chi sēhe Yaā Dios cúu i, te jíin i ndese Yaā cúu Yaā Dios. ⁸ Te ñayuu jeē tu cundáhú ni jnáhan, tu jíin i ndese Yaā cúu Yaā Dios, chi máni jnūhun cundáhú ni iyó jíin Yaā Dios. ⁹ Súcuan ni steén Yaā Dios ndese cundáhú ni yā yohó, chi ni tají yá Sēhe ya ni quiiji ini ñayiví yáha, vēsú mañuhún-ni ya iyó, návāha cotecu yō ní cáni sáha ya. ¹⁰ Te yāha cúu jnūhun cundáhú ni: nasūu jéē xihna maá yó ni íyo manī yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiiji, návāha socō yā maá yá jeē quende yā cuēchi yó.

¹¹ Ñánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. ¹² Ni ñn ñayuu tu ní jíto cuiti nuū Yaā Dios. Te núu cundáhú ni yō jnáhan yó, te ndéé Yaā Dios ini anuá yō, te je ni ije vāha ni yō jíin jnūhun cundáhú ni. ¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndéé Yaā Dios ini yō. ¹⁴ Te ni cajito ri te cácastūhun rí jeē maá Tátá yō ni tají yá Sēhe ya ni quiiji návāha jnama ya ñayuu ñayiví. ¹⁵ Te núu ndé ñáyuu jejnūhún i jeē Séhe Yaā Dios cúu Jesús, te ndúu i jíin Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnáhan, ndúu i jíin Yaā Dios, te ndéé yá ini anuá i. ¹⁷ Te súcuan cúu jeē íje vāha ni yō jíin jnūhun

cúndáhú ni, návāha ma yūhu yó quiṽi sándaā yā jniñu yó. Chi nájñūhun cúndáhú ni Cristo, suni súcuan cándāa máá yó ini ñayīṽi yáha. ¹⁸ Te núu manī yō jíin yá, te tu yúhú yó nuū yā. Chi núu ni ije yó jíin jñūhun manī yō jíin yá, te tú na siquī yuhú yó nuū yā. Chi jñūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jñūhun manī i jíin yá.

¹⁹ Te yóhó chi manī ndasí yó jíin Yaā Dios, chi xīhna gā maá yá ni cundáhú ni yā yohó. ²⁰ Te núu ññ ñayuu cahán i jeē maní i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ññ ñayuu tu íyó mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. ²¹ Chi je ni ndacu ya jniñu yáha nuū yō: Ñayuu jeē maní i jíin Yaā Dios, suni na cóo manī i jíin jnáhan i.

Jeē cúndeyí yó siquī jeneé íyó ini ñayīṽi

5

¹ Tāca ñayuu jeē cá candíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cá cundáhú ni i ñayuu cácuu sēhe ya. ² Súcuan jíin yō jeē cundáhú ni yō ñayuu cácuu sēhe ya, núu manī yō jíin yá te squícu yó jniñu ndácu ya. ³ Chi jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chi tú vēyi. ⁴ Chi tāca ñayuu cúu sēhe Yaā Dios, cúndeyí i siquī jeneé íyó ini ñayīṽi. Te jeē candíje yó jē cundáhú ni yā yohó, yúcuan cúu fuerza jeē sáha jeē cúndeyí yó. ⁵ Máá-ni ñayuu jeē

candíje jeē Jesús cúu Sēhe Yaā Dios, máá i cúu jeē cúndeyí síquī jeneé íyó ini ñayíví.

Jnūhun cáhán ndaā síquī Séhe Yaā Dios

⁶ Te jeē ní quiji Jesucristo ini ñayíví, chi ni jendute ya jíin ndute, te ni jeti ñíñi yā jeē ni jíhī yā jehē yō. Te nasūu máá ñn-ni jeē ní jendute ya jíin ndute, chi suni ni jeti ñíñi yā. Te máá Espíritu Yaā Dios cahán ndaā síquī yā, chi nuū maá Espíritu vēji jnūhun ndaā. ⁷ Chi ini andiví íyó únī jeē cácahān ndaā síquī jnúhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñn-ni cúu ya. ⁸ Te ini ñayíví suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti ñíñi yā. Te ndinúni yáha, chi inuú-ni stéén síquī yā. ⁹ Te cájetáhú yó jnūhun cácahān ndaā tēe, te jéhnú ga cúu jnūhun cáhán maá Yaā Dios. Te jnūhun ni cahān yā cúu jnūhun síquī Séhe ya. ¹⁰ Ñayuu cácandíje jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácandíje jeē ni cáhān Yaā Dios, nájnūhun cásáha i jeē Yaā stahú cúu ya, chi tu cácandíje i jnūhun ni cahān ndaā yā síquī Séhe ya. ¹¹ Te jnūhun ndaā un cúu jeē ni sáha ya jeē cótecu yō ní cáni, te Sēhe ya ndíso jnūhun cotecu yō. ¹² Ñayuu jeē iyó Séhe ya jíin i, je ni nihīn tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

Jnūhun consejo jeē sándihí

¹³ Jnūhun yáha tēe ri nuū rohó ñayuu cácandíje Sēhe Yaā Dios, návāha cucáhnu ni rō jeē ni nihīn tahú rō cotecu rō ní cáni.

¹⁴ Te cúcáhnū ni yō Yaā Dios, chi jíní yō jeē núu na vé jicán yō nuū yā jeē suni cúní maá yá, te jíní nahín yá jeē jicán yō. ¹⁵ Te núu jíní yō jeē jíní nahín yá jeē jicán yō, núu súcuan te suni jíní yō jeē sáha ya jeē jicán yō.

¹⁶ Núu ññayuu jíní i jeē sáha jnáhan i cuēchi jeē násūu cuéchi jeē jnahnú ndetū i cúu, te na cácan tahu i nuū Yaā Dios, te cuāha ya jñūhun cotecu jnáhan i, te núu násūu cuéchi jeē sáha jeē jnahnú ndetū i cúu. Iyó cuéchi jeē jnahnú ndetū i sáha, te tu cáhán rī jeē cacán tahu rō jehē ññayuu sáha cuēchi súcuan. ¹⁷ Tācá jniñu néé cúu cuēchi, te íyó cuéchi jeē násūu jéē jnahnú ndetū i cúu.

¹⁸ Te jíní yō jeē tāca ññayuu cácuu sēhe Yaā Dios, tu jíca i jíin cuéchi. Chi Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíní yō jeē séhe Yaā Dios cácuu yó. Te ññayuu ní ññáyiví yíhi i ndaha jexeén.

²⁰ Te suni jíní yō jeē ní quiji Sēhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúú yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni. ²¹ Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022
9665e546-39d0-5bd5-8b10-38916a94951f